

欽定續通志



欽定續通志卷四百三十一

列傳

金九

楊伯雄

伯淵

張用直

劉樞

毛碩

李上達

高德基

鄧伯順

劉微求

賈少沛

伊喇

鄂爾多

珠勒根彥忠

張九思

高衍

楊邦基

丁諱仁

王之

大懷貞

盧孝儉

李侶

楊伯雄字希雲真定靈城人皇統二二進士海陵留守中京其父邱行在幕府伯雄來省海陵深器之久之調韓州軍事判官有一盜詐稱賈販實欲劫取伯雄伯雄執而詰之并獲其黨十餘人一郡駭服遷應奉翰林文字是時海陵執政屬使時至其第伯雄不往他日怪問之對曰君子受知於人當以禮進附麗奔走非素志也海陵竊立問治道何貴對曰貴靜乙夜復問鬼神事伯雄曰漢文帝前席賈生不問百姓而問鬼神後世譏之陛下不以臣愚陋幸及天下大計鬼神之事未之學也固問乃曰臣家有書記人死復生或問冥官何以免罪答曰舊置一厯白日所爲暮夜書之無不可書者故復生耳海陵爲之改容夏日與登瑞雲樓納涼命賦詩卒章云六月不知蒸鬱到清涼會與萬方同海陵忻然以示左右曰伯雄出語不忘規戒爲人臣當如是矣海陵議征江南伯雄奏晉武平吳皆命將帥何勞親總戎律不聽仍落起居注不復召見大定初爲少詹事兄子蟠爲左贊善言聽諫從時論榮之集古太子賢不肖爲書號瑤山往鑒進之及進羽獵保成等箴皆見嘉納六年帝幸西京欲因往涼陁避暑伯雄諫不聽及至涼陁徼巡果有疏虞帝還謂近臣曰羣臣有幹局者衆矣如伯雄忠實皆莫及也十二年丞相石琚致仕舉伯雄以代時論以爲得人復權詹事知無不言匡救甚多凡官僚有詭隨者人必稱揚詹事以

愧之尋除平陽尹先是張浩治平陽有惠政及是百姓稱之曰前者有張後有楊徙河中尹卒諡莊獻弟伯傑伯仁族兄伯淵

伯淵字宗之早孤事母以孝聞天會十四年賜進士知泰安軍有惠政百姓刻石紀其事四遷山東東路轉運使正隆末羣盜蠭起州郡往往罹害獨濟南賴伯淵保全大定三年致仕卒

張用直臨潢人少以學行稱遼王宗幹延置門下海陵與其兄克皆從之學天眷二年賜進士及第除禮部郎中海陵卽位爲太子詹事嘗謂曰朕雖不能博通經史亦粗有所聞皆卿平昔輔導之力太子方就學宜善導之朕父子並受卿學亦儒者之榮也爲賀宋國正旦使卒于汴海陵深悼惜之養子始七歲特授武義將軍

劉樞字居中通州三河人少以良家子從軍屯河間同輩皆騎射獨樞刻意經史登天眷二年進士調唐山主簿改飛狐令蔚州刺史恃功貪污怒樞無所奉撫以他事繫獄將致之死會廉察使至得實守倖而下皆抵罪廢錄樞治狀入優等躋遷奉直大夫張浩營建燕京宮室選樞分治工役遷尙書刑部員外郎鞫治太原尹圖克坦額呼楚克反狀旬日獄具大定間爲中都路轉運使卒于官

毛碩字仲權甘陵人宋末試弓馬子弟碩中選調高陽關路安撫司准備差使歷河間尉兵馬都監宗望軍至碩以本部迎降齊國建由淮東路第一副將擢知滑州劉麟伐宋充行營中軍統制軍馬天眷間歷汴京路山東西路兵馬都監皇統元年權知拱州宋將張俊據亳州柘城酒監房人傑叛以應俊碩發兵討之至柘城諭其耆老縣人縛人傑以降碩召百姓慰安衆皆感悅刻石紀其事四年眞授拱州刺史元帥宗弼承制授武義將軍改知曹州有書生投書於碩辭涉謗訕碩延之上座謝曰使碩常聞斯言庶乎寡過士論嘉之遷鄭州防禦使尋改通

州天德二年充陝西路轉運使碩奏陝右邊荒種藝不過麻粟蕎麥賦入甚薄市井交易惟川絹乾薑商賈不通酒稅又耗減請視汴京燕京例給交鈔通行

按食貨志金初用遼宋舊錢貞元二年蔡松年始復鈔引法道製交鈔與錢並用本傳載碩之奏在天德間則交鈔固不始于蔡松年也

而鞏會德順道路多險鹽引斤數太重請一引分作三四以從輕便朝廷皆從之秦州倉粟陳積百姓有支移者止就本州折納其直公私便之改河東南路轉運使上言頃者定立商酒課不量土產厚薄戶口多寡及今昔物價之增耗一概理責之致監官被繫失身破家折備逃竄或姦吏盜有實錢而以賒券輸官故河東積負至四百餘萬貫公私苦之請自今禁約酒官不得折准賒貸惟許收用實錢則官民俱便秩滿除南京路都轉運使大定六年致仕卒於家碩文雅好士性謹飭每見古人行事有益於時者常書置座右以爲莅官之戒云

李上達字達道曹州濟陰人在宋時以蔭補官累遷東平府司戶叅軍達蘭取東平上達降並給軍須號稱辦治齊國建爲吏部員外郎攝戶部事劉豫行什一之法樂歲輸多歉歲寡取之然收斂之時民不以實輸官官亦不肯盡信於是告許起而獄訟繁公私苦之上達論其弊端改定爲五等之制齊國廢以河南與宋人上達隨地入宋宗弼復取河南上達爲同知大名尹按察陝西河南是時關陝蒲解汝蔡民飢上達輒以便宜發倉粟賑百姓累遷知山東西路轉運使上達到官再期比舊增三十餘萬貫戶部以其法頒之鄰路上達長於吏事能治繁劇猾不能欺所至稱之卒於官

高德基字元履遼陽渤海人皇統二年登進士第六年爲尙書省令使海陵爲相專悞自用德基每與之詳辨及篡位欲都燕京命德基攝燕京行臺省都事累遷戶部郎中正隆時營建南京宮室德基與李霽蕭中一俱爲營造提點轉同知開封尹大定三年以察廉治狀不善下遷同知北京路都轉運使事是年秋土河泛濫水入京城

德基遽命開長樂門疏入御溝以殺其勢水不爲害遷刑部侍郎七年改中都路都轉運使九年轉刑部尙書有犯罪當死者宰相欲從末減德基曰法無二門失出猶失入也不從及奏上帝是刑部議因諭諸尙書曰自朕卽位以來以政事與宰相爭是非者德基一人而已自今部上省三議不合卽具以聞爲宋主生日使及還宋人禮物外附進臘茶三千勝不親封署德基曰姪獻叔而不署是無名之物也却之十一年改戶部尙書上疏乞免軍須房稅等錢減農稅及鹽酒等課未報隨朝官俸粟折錢增高市價與之多出官錢幾四十萬貫帝以其取悅宰執近臣濫出官錢決杖八十詔自太定十一年十一月有按世宗紀太定十一年十一月丁亥史臺戶部轉運司警巡院多支俸粟折錢皆追還之德基降蘭州刺史十二年卒子錫入忠義傳

完顏鄂博庫會寧府海古勒寨人年十三選充女真字學生補上京女真吏再習小字兼通契丹文字充尙書省令史天德初除吏部主事鞫問扎蘭路詐襲穆昆事人稱其能擢右拾遺累遷右司郎中大定二年秩滿當代世宗喜其公忠善敷奏特詔再任幹罕已平詔罷契丹明安穆昆其原管戶口及從幹罕作亂來降者皆隸女真明安穆昆遣鄂博庫分置人戶賑贖其乏其未經罷去明安穆昆合承襲者仍許承襲兼括買契丹馬匹頃之改同知大興尹遷橫海軍節度使獻囚能得其情人以爲不寃五年卒於官

劉徽柔字君美大興安次人天眷三年擢進士第歷眞定樂城主簿遷洪洞令徽柔明敏善聽斷縣人楊遠訴夜雨屋壞壓其姪死徽柔熟視曰汝利姪財而殺之乃誣雨耶叱付獄其人立伏遂寘于法秩滿縣人遮戀爲立生祠刻石頌德正隆二年入爲大理評事遷司直大定二年同知河東南路轉運使事以廉第一改知平定軍累遷中都路轉運使卒於官

賈少冲字若虛通州人勤學家貧甚嘗道中獲遺金訪其主歸之天會中再伐宋調及民兵少冲甫冠代其叔行中天眷二年進士劉旆欲妻以妹辭不就調營州軍事判官遷定安令蔚州刺史恃貴不法少冲獨守正不阿用廉進官一階累遷河中府判官見海陵寢失道秩滿乃不求仕大定二年調御史臺典事遷刑部郎中往北京決獄奏誅首惡牽連者皆釋之全活凡千人以本職攝右司員外郎除同知河間尹數月入爲祕書少監兼起居注左補闕十四年爲宋主生日副使宋人別致珍異少冲曰行人受賜自有常數敢以賂辱君命乎不受使還遷右諫議大夫祕書起居注如故十七年請老不許除衛州防禦使歷順天軍節度使卒少冲外柔內剛賞執奏刑名甚堅帝嘉其有守性簡易不喜言利嘗教諸子曰陰所以庇身筦庫不可爲也聞者尙之子益

益字損之少穎悟如成人大定十四年父少冲使宋益侍行時宋人常爭起立接書之禮少冲問益曰卽宋人欲變禮持議不決奈何益曰守死無辱可謂使矣少冲大奇之中大定十九年進士調河津主簿丁父憂去官察廉起復礬山令補尙書省令史丁母憂服闋除定海軍節度副使累官順天軍節度使大安初召爲吏部尙書改鎮安國軍益調民夫修完城郭爲戰守備按察司止之不聽曰治城守臣事也按察何預旣而兵至以有備解去改橫海定國軍節度使道阻不赴貞祐二年召爲太常卿上防秋十三事與戶部尙書李革論遷河北軍民不便不報明年致仕元光元年卒

伊喇鄂爾多一名巴錦系出遼五院司通契丹字天會三年從伐宋遇戰輒先登屢獲偵人以功補尙書省令史十五年籍發諸部兵將與右丞蕭慶會於山後時官軍竄而南者凡數千鄂爾多邀擊之盡獲其輜重悉送有司遷修武校尉宗弼復河南鄂爾多督諸路帥臣進討事定遷宣武將軍皇統二年同知昭德軍節度使事以廉升

孟州防禦使正隆間轉同知北京留守事會伊克河蘭子山等明安契丹謀亂時方發兵討之別遣鄂爾多押軍南下至松山縣爲賊黨講格所執欲推爲主盟鄂爾多怒曰我受國厚恩豈能從汝反耶賊欲害之鄂爾多說其監奴因得脫還大定初爲博州防禦使遷利涉軍節度使先是育農民避賊入保郡城以錢寄鄰家賊平索之鄰人不與訴于縣縣官以無契驗却之乃訴于州鄂爾多陽怒械繫之捕其鄰人詰之曰汝鄰坐刼殺人指汝同盜鄰人懼始自陳有欺錢之隙乃責歸所隱錢而釋之郡人駭服改通遠軍節度使卒

珠勒根彥忠本名幹克善哈斯罕人好學通吏事天會十四年選充兵部孔目官升尙書省令史除右司都事天眷七年改大理丞爲會寧少尹進同知會寧府事入爲吏禮部郎中貞元二年進本部侍郎海陵凡有所疑常使彥忠裁決彥忠據法以對間有不合召讓之彥忠執奏如前終無阿屈海陵壯之明年除御史中丞歷戶部侍郎侍衛親軍副都指揮使海陵南伐除南京路都轉運使大定二年改大名尹兼本路兵馬都總管四年入爲刑部尙書詔規措北邊艱食戶口及泰州臨潢接境度宜安置堡戍七駐兵萬三千芻糧之用就經畫之還朝未及入對以疾卒彥忠性孝友嘗使宋所得金帛盡分兄弟親友云

張九思字全行錦州人皇統初補行臺胥女真譯史除易州同知三遷亳州防禦使劉歸德尹劉仲延受宋國歲貢於泗州往歲受歲貢者每以幣物不精責宋使者宋使私饋銀幣以爲常九思獨不肯受仲延從之自是私饋遂絕自大理評事再遷大理少卿清池令雙申陳其父虔於天眷初知永安軍遇叛寇孟邦傑執而脅之不從遂被害乞正班用廢大理寺議虔子止合雜班敘九思曰虔奮不顧身守節以死其子宜正班用廢以勸忠孝世宗從之改工部郎中大興少尹同知中都都轉運使事轉刑部侍郎改工部九思所守清約然急於進取一切以功

利爲務不恤百姓詔檢括官田凡地名疑似者如皇后店太子莊食貨志作太子莊燕樂城之類不問民田契驗一切籍

之復有鄰接官地冒占幸免者世宗召還責之轉御史中丞奏言屯田明安人爲盜徵償家貧輒賣所種屯地請

家貧不能徵償者令事主以其地招佃收其入估買與徵償相當卽以其地還之臨洮尹完顏讓乞用九思議詔

從之遷工部尙書帝謂左丞張汝弼曰九思耄矣頗強執自用欲令外補何如時九思子若拙爲尙書省令史冒

填詔敕事覺亡命汝弼奏其事帝曰九思豈不知若拙處耶可免其官捕若拙獲日授職九思開命惶惶因感疾

卒

高衍字穆仲遼陽渤海人敏而好學自少有能賦聲同舍生欲試其才使一日賦十題衍執筆怡然未暮十賦皆

就俱可觀登進士第乞歸養逾二年調鄴陰丞召爲尙書省令史除右司都事母喪去官起復吏部員外郎擢左

司員外郎大奉國臣者永寧太后族人先爲東京警巡院使以賊免去欲因太后求見海陵不許衍與奉國臣有

鄉里舊擬爲貴德縣令海陵大怒杖衍降爲清水縣主簿居二年爲大理司直累遷吏部郎中大定初轉左司郎

中世宗孜孜求諫羣臣承順旨意無所匡正使衍傳詔臺省百司曰凡上書言事或爲沮遏許進表以聞遷吏部

尙書每季選人至吏部託以檢閱舊籍謂之檢卷有滯留至後季猶不得去者衍三爲吏部知其弊歲餘銓事修

理選人便之五年爲賀宋國生日使中道得疾去職七年卒

楊邦基字德懋華陰人父縯宋末爲易州州佐宗望伐宋蔡靖以燕山降易州來附縯被殺邦基匿僧舍中得免

既長好學天眷二年登進士第調灤州軍事判官遷太原交城令太原尹圖克坦恭貪汙不法命屬縣輸金邦基

獨不與秉德按熙宗紀天眷八年遣參知政事秉德廉察官吏尹與九縣令皆免去邦基以廉爲河東第一召爲禮

部主事遷兵部員外郎擢吏部差除坐銓注李慶之忤海陵意降坊州宜君

其按地理志坊州隸縣二宜君其一也原文作宜春今改正主簿轉

高密令大定初太師張浩薦邦基人材可用請除刑部郎中帝許之改太府少監累遷祕書監兼左諫議大夫修起居注中都警巡使張子衍道遇皇太子衛仗立馬市門不去繳衛士訶之子衍鞭衛士御史臺劾奏子衍邦基以姻故爲子衍求解及入見顯宗求脫子衍罪詔削子衍官兩階邦基坐削官一階出爲西京留守同知徙山東東路轉運使永定軍節度使致仕二十一年卒邦基能屬文善書尤以畫名當世云

丁諱仁字藏用大興府宛平人父筠以吏補州縣所至有治聲致仕後鄉里鬪訟者多就質焉諱仁冲澹寡欲讀書外無他好遼季避難間關道塗未嘗釋卷皇統二年登進士第調武清縣丞縣經兵革後無學校諱仁召邑中俊秀子弟教之學百姓欣然從之調磁州軍事判官以廉擢守事遷和川令前令罷戾不事事羣小越法干禁無所憚諱仁申明法禁皆屏息有董祐者最强悍畏服諱仁以刀斷指誓終身不復犯法凡租賦與百姓前爲期率比他邑先辦歷北京推官再遷大理司直大定三年除定武軍節度副使而節度使同知皆闕諱仁爲政無留訟改大理丞吏部員外郎轉戶部郎中時賈少冲爲刑部郎中帝以少冲爲人柔緩不稱刑部之職乃以諱仁易之坐尙詹局官私用官芻糧格解職改祁州刺史祁州按金地理志祁州與定武軍俱屬河北西路傳稱爲定武支都則當是祁州至祁州則屬河東北路矣原本訛祁爲祈正改爲定武支郡士民聞諱仁之官歡迎界上相屬不絕改同知西京留守事首興學校以明養士之法徙陝西西路轉運使二十一年卒於官

曹望之字景肅其先臨潢人遼季移家宣德天會間選充女真字學生年十四業成除西京教授歷行臺省令史除右司都事吏部侍郎田穀素薄望之望之願交不肯納遂與蔡松年許霖構致黨獄陷穀等於死天德元年調

同知石州事坐事免久之除絳陽軍節度副使入爲戶部員外郎詔望之以牛萬頭分給案春八明安徙居南京
者薩巴反望之轉致甲仗八萬自洛州輸燕子城又運米八十萬斛由蔡水入淮饋伐宋諸軍一日而至進本部
郎中特賜進士及第大定初討斡罕望之主軍食給與有節帥府以捷入告議者欲遂罷轉輸望之以爲元惡未
誅不可弛備旣而大軍迫討果賴以濟以勞進一階兼同修國史請於大鹽澳設官榷鹽聽民以米貿易民成聚
落可以固邊圉其利無窮從之其後凡貯米二十餘萬石及東北路歲饑賴以濟者不可勝數三帝以正隆兵
興農桑失業遣望之及魏子平李滌等分道勸農廉問職官臧否望之還奏乞汰諸胥吏可減其半詔胥吏如
故惟禁用貼書遷本部侍郎領覈實繕修大內財用費用大省復以勞進階望之家奴袁一言涉妖妄大興府鞫
治望之恐使戶部令史劉公輔間其事於大興少尹王全全具語其事御史臺劾奏劉公輔等泄獄情決杖除名
頃之運河湮塞不治乃用陸運世宗責望之往治之太宗實錄成望之等賜銀幣有差望之嘆賞薄世宗以其不
忠出爲德州防禦使到官有惠政百姓爲立生祠改同知西京留守事上書論便宜事其一論山東河北明安穆
昆與百姓雜處民多失業陳蔡汝潁之間土廣人稀宜徙百姓以實其處復數年之賦以安輯之百姓亡命及避
役軍中者閭閻其人使還本貫或編近縣以爲客戶或籍姓名留爲佃戶州縣與明安事干涉者無相黨匿庶幾
軍民協和盜賊弭息其二論薦舉之法宜令宰執歲舉三品二人御史大夫以下內外官終秩舉二人終秩不舉
者遇轉官勒停三品者削後任俸三月其待以不次者宰執具才行功實以聞吏部每季圖上外路職官姓名大
書職汗者於其名下使知畏慎年六十以上者終更赴調有司察其視聽精力老疾不堪釐務給以半祿罷遣其
三論守邊將帥及沿邊州縣官漁剝軍民多輿力役宜歲遣監察御史周行察之邊部獄訟招討司無得輒遣白

身人徵斷宜於省部有出身女真契丹人及縣令丞簿中擇廉能者因其風俗略定科條務爲簡易徵斷羊馬入官籍數如邊部遇饑饉卽以此賑給之軍中舊籍馬死一村均給補買往往鬻妻子賣耕牛以備之臣恐數年後禦防因弊臨時賑濟費財十倍而無益當早爲之所以富邊備官給軍箭用盡則買補皆朽鈍不堪用可每歲給官箭一分以補其闕邊民闕食給米地遠負重往往就倉賤賣而去可計口支錢則公私兩便陝西正副宜如明安穆昆用土人一員隊將亦宜參用土人久居其任增弓箭田復其賦役以廉吏爲提舉舉察總管府以下官農隙校閱以嚴武備則太平之時有經略之制矣又論六鹽場用人宜令戶部公義辟舉論漕運先計河倉見在幾何通州容受幾何京師歲費幾何今近河州縣歲稅或六七萬石小民有入資之費富室收轉輸之利宜計實數以科稅入論民間私錢苦惡宜以官錢五百易私錢千期一月而盡過期以銷錢法坐之論州府力役錢物戶部頒印署白簿使盡書之以俟審閱有畏避不書者坐之論工部營造調發妨民生業諸路射糧軍約量人數習武藝期以三年成以息調民書奏多見采納以本官行六部事於北邊召拜戶部尙書時戶部尙書高德基坐高估俸粟責降世宗念望之吝出納或懲德基也使人諭之曰要在平估而已望之久習事有治錢穀名性剛愎頗沾沾自露希覬執政世宗以望之急於見知涉躁進未及用尋卒以其子淵爲奉御澤爲筆硯承奉望之初不學及貴稍知讀書遂刻苦自致有詩集三十卷。

大懷貞字子正遼陽人皇統五年除閤門祇候累官右宣徽使正隆伐宋爲武勝軍都總管大定二年除洛州防禦使累遷彰國安武軍節度使尉尉盜得一旗上圖亢宿詰之有謀叛狀株連幾萬人懷貞止以亂民之刑請誅其首亂者十八人餘皆釋之嘗以私忌飯僧數人就中一僧異常懷貞問其曾爲盜殺人否對曰無之後三日

詰盜果引此僧皆服其明察改興中尹錦州富民蕭鶴壽途中殺人匿府少尹家有司捕不得懷貞以計取之實於法改彰德軍節度使卒

盧孝儉宣德州人登天眷二年第累官太原少尹大定二年陝西用兵尙書省發本路稅粟赴平涼期甚嚴迫孝儉易以金帛馳至用省而不失期并人稱之用廉進官二階遷同知廣寧尹廣寧大饑民多流亡失業乃借僧粟使平其價市與貧民累遷山東東路轉運使孝儉素褊躁與同僚王公謹失歡其子嘗私用官帑孝儉不知也既而改河北西路轉運使公謹乃發其事孝儉聞被逮莫測所以行至章邱自縊死

李偲字子友定州安喜人中天眷二年進士調遼山簿累官戶部主事除同知河東南路轉運使事大定初改同知中都路轉運使事三年權知登聞檢院再遷戶部侍郎改沂州防禦使沂南邊郡戶部借民間田種禾取蠶絲以備警急偲曰如此則農民失業具奏止之轉運司牒郡輸粟胸山調急夫數萬人時久雨泥濘輓運不能前偲遣吏往胸山刺取其官廩見儲糧數可支半歲卽具其事牒運司請緩期毋自困百姓先是郡縣街陌間聽民作廩舍取其儼直至是罷收儼而廩舍一切撤毀他郡奉承號令督百姓必盡撤去偲獨教民撤治前卻不齊者三五所使巷道端正民便之改陝西西路轉運使卒

欽定續通志卷四百三十一

列傳

金十

富察世傑 蕭懷忠 伊喇諧達 富珠哩阿老罕 完顏薩哈 龐迪 伊喇成 舒穆魯卡 伊喇道

楊仲武 趙興祥 舒穆魯榮 敬嗣暉 富察通 鈕祜祿額特塔

富察世傑本名阿薩爾哈斯罕鄂都河人徙遼陽初隸宗弼軍每與武士角力賭羊輒勝能以拳擊四歲牛折其脅有糧車陷淖中七牛挽不能出世傑手出之宗敏爲東京留守召置左右海陵篡位用爲護衛賂以重賞令除兄弟有異志者世傑受詔而不肯爲海陵怒面責之世傑曰臣不以非道害物海陵愛其勇不之罪也正隆四年盡籍諸路兵伐宋他使者唯恐不如詔得數多世傑往海蘭路得數少海陵怪問之對曰海蘭地接高麗今若多籍其丁卽有緩急何以爲備海陵喜曰他人用心不能及也除同知安國軍節度使事時徵發不已民不堪命犯法者家邢人按金地理志邢州宋信德府天會七年降爲邢州置安國軍節度使世傑時爲節度同知邢人正其屬也本傳訛作邢人謹改正無長吏獄囚積四百餘人世傑到

官月餘決遺略盡入爲宿直將軍以事往呼爾哈路還奏契丹部族大抵皆叛百姓警擾不安今舉國南伐賊若乘虛而入雖得江淮無益也宜先討平契丹南伐未晚海陵不悅曰詔令已出矣今以三萬兵選將屯中都以北足以鎮壓世傑又曰若東土大族附於賊恐三萬衆未易當也海陵不聽及發汴京授鄭州防禦使領武捷軍副總管大軍渡淮世傑以軍三千護糧運東下敗宋兵數千人奪其戰船甚衆至和州境擊宋兵五萬人走之明日使其子烏達領二百八十騎爲應兵自領八百騎前戰宋兵奔潰大定初世傑取陝州敗宋兵石壕鎮復敗宋援

兵三千人遂圍陝州宋兵三千自潼關來世傑以兵二百四十迎擊之射殺十餘人宋兵敗走復敗之於土壕山生擒一將復以四穆昆軍敗宋兵於土華復圍陝州親率選卒二百餘人穴地以入城遂拔再破宋軍三萬人復虢州未幾爲衛州防禦使改河南路統軍都監召起關帝慰勞良久除西北路副統賜廐馬弓矢佩刀從布薩忠義討契丹賊平改華州防禦使與圖克坦喀齊喀經略隴右喀齊喀復德順至東山堡宋兵捍絕樵路世傑擊走之追至城下城中出兵約二萬餘復敗之宋經略使荆皋棄德順走世傑與左都監璋追破其軍改亳州防禦使四遷通遠軍節度使宋人輒入鞏州境糶米麪有司執之世傑署案作歸附人縱遣之譯吏蔡松壽誣府主謀叛坐貶十八年起爲弘州刺史母憂去職累遷亳州防禦使卒世傑少貧然疏財尙氣每臨陣破敵必戒士卒毋縱殺掠平居非忠孝不言親賢樂善甚獲當世之譽云

蕭懷忠本名海呼奚人也爲西北路招討使蕭裕等謀立遼後使蕭珠展往西北路結懷忠并結節度使耶律朮爲助懷忠與朮有隙遂執珠展并執朮遣使上變裕等既誅懷忠爲樞密副使賜今名復爲西北路招討使西京留守封王改南京留守契丹薩巴反復以懷忠爲西京留守西南面兵馬都統與樞密使布薩師恭北京留守蕭曠右衛將軍蕭圖喇護衛十人長鄂勒博往討之大軍追薩巴不及海陵疑懷忠與蕭裕皆契丹人本同謀恐其與薩巴合又以圖喇無功懷忠曠師恭逸賊於是殺師恭曠懷忠皆族滅其家並誅鄂勒博圖喇大定三年追復懷忠等官爵

伊喇諱達遼橫帳人父瑄和與耶律伊都俱來降西京下復叛瑄和遇害諱達以父死事授左奉宸熙宗初充護衛累官東京副留守完顏守道經略北方諱達攝咸平路屯軍都統入爲兵部侍郎除武定軍節度使以招徠邊

鄧功遷東北路招討使改臨潢尹卒諱達騎射絕倫善相馬嘗閱馬於市見馬甚羸瘦以善價取之他日果良馬也

宮珠哩阿老罕隆州伯爾克山人年八歲選習契丹字再選習女真字既壯爲黃龍府路萬戶令史貞元二年試外路胥吏第一補宗正府令史累擢尙書省令史布薩忠義討斡罕辟置幕府掌邊關文字斡罕既平阿老罕招集散亡復業者數萬人復從忠義伐宋屢入奏事論列可否宋人請和忠義使阿老罕往和議定入奏忠義薦阿老罕有才幹授尙書省都事除同知順天軍節度事累遷侍御史復以赫舍哩良弼薦遷勸農副使兼同修國史侍御史如故改右司郎中奏請徙河南戍軍屯營城中者於十里外徙之遷吏部侍郎除山東統軍都監徙置河南八明安遷武勝節度使入爲吏部尙書改西南路招討使有司督本路明安人戶所貸官粟阿老罕乞俟豐年從之軍人有以甲葉貿易諸物天德權塲及界外歲采銅礦或因私挾兵鐵與之市易皆一切禁絕土番軍不許用親戚及傭雇人營塹損地以時葺治不與所部明安穆昆會宴故兵民皆畏愛之改陝西路統軍使兼京兆尹陝西軍籍有闕舊例用子弟補充多不堪用阿老罕於伊勒希旗鼓手內選補軍人以春牧馬經夏不收飼瘠弱多死阿老罕命以時收秣之故死損者少仍春秋督閱軍士騎射以嚴武備終南采漆者節其期限檢其出入以防姦細帝以阿老罕爲人沈厚所至稱治召爲參知政事命條上天德陝西行事帝稱善以疾乞致仕除北京留守卒

完顏薩哈上京納爾輝河人其先居烏楞古河身長多力善用槍金師南征睿宗爲右副元帥置麾下佩以金牌使督軍事天德元年授本班祇候郎君詳袞後從軍泰州路軍帥以薩哈爲萬戶領尼楚赫等明安戍北邊數有

戰功二年正月遣使夏國諭以卽位事因令伺彼之意既還稱旨爲兵部郎中改同知會寧尹累遷海蘭路都總管海陵伐宋授衛州防禦使爲武震軍都總管世宗卽位遣使召薩哈既至除武昌軍節度使改安化軍兼山東路副都統大定四年徙鎮安武仍兼副統領山東大名東平三路軍八萬餘渡淮會大軍伐宋進至楚州宋遣使奉歲幣還邳州卒

龐迪字仲由延安人少倜儻喜讀兵書習騎射學推步孤虛之術無所用乃應募隸涇原路第三副將破賊有功授保義郎嘗從百餘騎經行山谷遇夏人數千衆駭懼請避迪躍馬犯陣敵皆披靡身被重創完軍以還自是知名擢爲正將尋以張中孚薦授迪權知懷德軍兼沿邊安撫使夏軍五萬薄城迪開門待之敵不敢入因以數千騎分門突出遂破之獲軍資甚衆復破關師古兵擢知鎮戎軍尋權淮南東路馬步軍副總管總制沂密淮陽兼權知沂州尋爲環慶路兵馬都鈐轄權知邠州齊國廢改華州防禦使之皇統二年降爲防禦使本傳除授在天鑑

以前面云防禦使者從乎其後也

軍變被執已而賊衆悔曰公爲政素善豈宜刳辱縱之還復領州事天眷初歷臨洮尹兼熙秦

路兵馬都總管陝右大飢流亡四集迪開渠溉田民咸利之官制行迪以博州團練使按金地理志博州有防禦使無團練使特授

定遠大將軍皇統七年除慶陽尹歷三考不易以治最聞詔書褒美正隆元年遷鳳翔尹屢上章求退不許海陵南伐徵斂煩急官吏因緣爲姦富者用賄以免貧者益困迪悉召民使共議增減不加威督而役力均人情大悅五年徙汾陽軍節度使大定初復爲臨洮尹遷南京路都轉運使以省事惜費安靜爲政河南稱之徙絳陽軍節度使卒於官迪性純孝父疾醫藥弗效迪仰天泣禱刳股作羹由是獲安昆弟析家財迪盡以與之官爵之廢率先諸姪疾革沐浴朝服而逝